

10-05-2023

UPA 2023/65

Kommuunit piffinni pinaveersaartitsinermut immikkoortumi anguniagaannut ikorfartuisussanik, Peqqissaanermik Ilinniarfiup ataani pinaveersaartitsinermik siunnersortitut ilinniartitaanermik pilersitsinissamik Naalakkersuisut peqquneqarnissaannik Inatsisartut aalajangiiffigisassaattut siunnersuut. (Inatsisartunut ilaasortaq Agathe Fontain, Inuit Ataqatigiit)

Inatsisartuni ilaasortaq, Agathe Fontain Inuit Ataqatigiit siunnersuuteqarneranut Siumumiit qujavugut.

Qinikkatut sulisugut tamatta sulissutigiuartariaqarparput pinaveersaartitsinerup nukittorsartuarnissaa. Minnerunngitsumik nunatsinni ajornartorsiutit aningaasarpassuarnik naleqartartut taamak amerlatigitillugit. Tassami Innuttaasut peqqissusaat pillugu ukiut sisamakkaarlutik misissuisoqartarpoq, misissuinerillu takutippaat nunatsinni peqqissutsikkut innuttaasut qanoq inissisimanersut.

Peqqissuserput qiviarutsigu, inuummartussuserput siulliullugu hurraarutissaanngilaq, naartuumik peersitsisarnerit, kinguaassiuutitigut nappaatit atuunneri il. il. amerlavallaarujussuarput. Imminut toquttarneq assorsuaq ajornartorsiutaavoq. Sunalu tamarmi taartuinnaanngilaq qiimmaallannalaartunnguamik qanittumi nutaarsiassaqarpoq, nunarsuatsinni kalaallit aalanerpaatut suaarutigineqarmata.

Ukiuni arlaqalersuni pinaveersaartitsinerit assigiinngitsut, qitiusumit pilersaarusiorneqartarput, ass. INUUNERITTA aamma PAARISAp tikkuussisuusarput nunalu tamakkerlugu pinaveersaartitseqataasarlutik. Malitsigisaanik pikkorissaasoqartarpoq, taamaakkaluartoq innuttaasut peqqissusaannik misissuinerup takutittarpaa: nunatsinni ajornartorsiutit qaangerniangassagut suli annertoorujussuusut.

Siumumiik piumassuseqarpugut, pinaveersaartitsineq nukittorsaavigiuassallugu, taamaattorli pingaarutilik unaavoq pinaveersaartitsinerimi suliaqartorpassuit ataqatigiissarneqarnissaat.

Pingaaruteqarpoq meeraaqqap naartuuneraniik inunngorneraniillu paaqqtarinnulluarnissaq tamannami meeraaqqap siunissaanut annertuumik tunngaviliisuusartoq ilisimatuussutikkut uppersineqarnikummat.

Aaliangiiffigisassatut siunnersuut apeqqutinik assigiinngitsunik pilersitsivoq:

Ullumikkut pinaveersaartitsinermit angusagut suuppat? Suut iluatsippat suullu suliniutit iluatsinngillat?

Pinaveersaartitsinermit suliniutinik kikkut atuilernikuuppat kikkullu aallartissimangillat?

Siunnersuuteqartup anguniarpaa, kommuunit piffinni pinaveersaartitsinermit immikkoortumi anguniagaannut ikorfartuisussanik, Peqqissaanermik Ilinniarfiup ataani pinaveersaartitsinermit siunnersortitut ilinniartitaanermik pilersitsisoqassasoq Naalackersuisulli allannguutissamik siunnersuuteqarput, Kommuunit piffinni pinaveersaartitsinermit immikkoortumi anguniagaannut ikorfartuisussanik, Peqqissaanermik Ilinniarfik suleqatigalugu pinaveersaartitsinermit siunnersortitut ilinniartitaanermik pilersitsinissamik suliamik aallartitsisoqassasoq.

Siunnersuuteqartup aammalu Naalackersuisut allannguutissatut siunnersuutaat qanorpiaq assigiinngitsiginersut paasiuminaalaarsinnaagaluartoq, imatut paasinarpoq siunnersuuteqartup anguniaraa ilinniarfik Peqqissaanermut ilinniarfiup ataaniissasoq Naalackersuisulli kissaatigaat Peqqissaanermik ilinniarfik suleqatigineqassasoq. Siumumi isumaqarpugut ilinniartitaaneq siunissami aallartittussaq eqqarsaatigalugu pinngitsoorani Nuummiittariaqanngitsoq kisiannili pinaveersaartitsinermit suliarlut sumiiffimminniiginnarlutik ilinniarnermik ingerlatsisinnaanerit aqutissiuunneqartariaqartoq taamaattumik Naalackersuisut allannguutissatut siunnersuutaat qaninnerullugu Siumumiik oqaatigissavarput.

Siunnersuutit siunertaa Siumumiik aammalu Naalackersuisut allannguutissatut siunnersuutaat taperserlugit Inatsisartut Ilinniartitaanermut ataatsimiittitaliaanni aappassanneerseqartinnagu suliarineqarnissaa innersuussutigaarput.

Doris J.Jensen, Siumut